



*Iesus declare à ses Disciples quel est le deuoir des Pasteurs, & la
stabilité de la Loy.*

IESVS dist à ses Disciples, Vous estes le sel de la terre, le sel est bon; mais s'il perd sa faueur, dequoy salera-t'on? Vous estes la lumiere du monde. Vne ville située sur vne montagne ne peut estre cachée: Et on n'allume point la lampe pour la mettre sous le muid. Ainsi donc vostre lumiere doit luire deuant les hommes, afin qu'ils voyent vos bonnes œuvres, & qu'ils glorifient vostre Pere qui est es Cieux. Ne pensez point que ie sois venu pour abolir la Loy, ains pour l'accomplir. Iusques à ce que le Ciel & la Terre faudront, vn seul poinct ne faudra de la Loy. Et outre remontre la vraye iustice, reformant les fausses interpretations de la Loy, que les Pharisiens auoient introduites touchant la rancune & homicide. Et admoneste tous les fideles à reconciliations, demontrant quelle doit estre leur bien-veillance enuers leurs aduersaires, & en quel malheur l'on peut tomber quand on n'est point d'accord avec son aduersaire. Et touchant le libelle de repudiation, comment le diuorce ne doit estre permis legerement, sinon pour cause de fornication. Semblablement il commande de ne iurer aucunement, ains que nostre parole soit, Oüy, oüy; ou, Non, non; car tout iurement superflu est du malin.

S. Matthieu Chap. 5.